

共同經課 - 1 約珥書二章一節~二節，十二節~十七節

1 Lin tiòh tī 錫安 pùn 哨角，tī 我 ê 聖山 pùn 號頭；國內 khiā 起 ê 百姓 lóng tiòh ngiāuh-ngiāuh-chhoah；因為耶和華 ê 日 beh 到，taⁿ 近 lah。2 Hit 日是烏烏暗暗，密雲烏暗 ê 日，親像 phah-phú 光色緻鋪滿山頭；有一族大 koh 強，從來 bē-bat 有 án-ni-ê，以後到代代也無。12 耶和華講，雖然 án-ni，lín tiòh 用專心，用禁食，用啼哭，用悲哀 oát-tng 歸 òng 我。13 Tiòh 拆裂 lín ê 心，莫得拆裂 lín ê 衫，歸 òng 耶和華 lín ê 上帝；因為祂有仁慈憐憫，無快快受氣，滿滿恩惠，koh 退悔祂 ê 災厄。14 Chī-chūi 會知伊肯 oát 倒 tng 來退悔，留福氣 tī 後來，就是有素祭灌奠獻 hō lín ê 上帝耶和華？15 Lin tiòh tī 錫安 pùn 哨角，設一個禁食 ê 聖日，召集嚴肅會；16 聚集眾百姓分別 hit-ê 會做聖，招集老人，聚集 gín-ná kap 食奶 ê；hō 新 kiáⁿ 婿出伊 ê 厝，新娘離開伊 ê 房。17 服事耶和華 ê 祭司，tiòh tī 冷廊 kap 祭壇 ê 中間啼哭，講，耶和華 ah，求祢寬恕祢 ê 百姓，莫得 hō 祢 ê 產業受凌辱，hō 列邦管轄 in；啥事 hō 列國 ê 人講，In ê 上帝 tī toh-lòh？

共同經課 - 2 詩篇五十一篇一節~十七節

1 大衛 kap Poát-sī-pa 同房以後，先知 Ná-tan 來見伊，伊做 chit-ê 詩；交 hō 樂官。1) 上帝 ah，照你 ê 慈愛憐憫我；照你豐盛 ê 慈悲擦消我 ê 過失；2 將我 ê 罪惡一盡洗除，亦洗清我，到無罪。3 因為我家已知我 ê 過失；我 ê 罪常常 tī 我 ê 面前。4 我所犯 tiòh-ê，就是得罪你 nā-tiāⁿ，Tī 你 ê 目矚前行 chit 號 pháíⁿ；致到你講話 ê 時，顯明做義；判斷 ê 時，顯明公道。5 我是 tī 罪惡中生 ê，Tī 罪 ê 中間，我 ê 老母懷孕我。6 你所 ài-ê 是心內誠實；Tī 我 ê 腹內，你 beh hō 我得 tiòh 智慧。7 求你用牛漆草洗我，我就清氣；求你洗我，我就比雪 khah 白。8 求你 hō 我得 tiòh 聽見歡喜快樂 ê 聲；Hō 你所 at 折 ê 骨 thang 歡喜。9 求你掩你 ê 面，無看我 ê 罪，擦消我一切 ê 罪惡。10 上帝 ah，求你 kā 我創造清氣 ê 心，Hō 我 ê 內面有換新正直 ê 神。11 M-thang 趕我，hō 我離開你 ê 面；M-thang tui 我收回你聖 ê 神。12 求你 hō 我猶原得 tiòh 你救恩 ê 快樂；賞賜我有自由 ê 神，來扶持我。13 我就將你 ê 道路指示有過失 ê 人；有罪 ê 人就 beh 歸順你。14 上帝 ah，你是救我 ê 上帝，求你救我脫離 thài 人 ê 罪；我 ê 舌 beh 大聲吟詩 o-ló 你 ê 義。15 主 ah，求你開我 ê 嘴唇；我 ê 嘴就 beh 報揚你 ê 好名聲。16 因為你無 ài 祭物；若 ài，我就 beh 獻；燒祭你亦無歡喜。17 上帝所 ài ê 祭，就是憂傷 ê 神；上帝 ah，憂傷痛悔 ê 心，你無 beh 看輕伊。

共同經課 - 3 哥林多後書五章二十 b 節~第六章十節

20 阮為 tiòh 基督求 lín kap 上帝 koh 和；21 上帝 hō hit-ê 無罪 ê 替咱成做罪，是 beh hō 咱 tiàm-tī 伊來成做上帝 ê 義。1 阮 kap 主同 tiòh 磨 ê 亦勸 lín m-thang 空空受上帝 ê 恩。2 (因為伊講，Tī 得 tiòh 接納 ê 時，我有聽你，Tī 拯救 ê 日我有幫贊你；你看，chit-tiáp 是受接納 ê 時，你看，chit-tiáp 是拯救 ê 日)3 阮一概無塞礙人，免得 chit-ê 職份犯嫌；4 就是凡事證明本身合 tī 做上帝 ê 差用，是 tī choē-choē 吞忍、患難、5 欠缺、困迫、受 phah、關監、擾亂、tiòh 磨、無暈、無食、6 廉潔、知識、寬容、仁慈、聖神 ê 感化、無假 ê 疼、7 真理 ê 道、上帝 ê 權能，用義 ê 戰器 tī 左右，8 無論榮光凌辱，pháiⁿ 名聲好名聲；親像騙人 ê，其實是誠實 ê；9 親像人 m̄ 知，其實 choē-choē 人知；親像 beh 死，其實是活；親像受責罰，其實無致到死；10 親像煩惱，其實常常快樂；親像 sòng-hiong，其實 hō choē-choē 人富；親像無有，其實是無 m̄ 有。

共同經課 - 4 馬太福音六章一節~六節，十六節~二十一節

1 謹慎莫得 tī 人 ê 面前行 lín ê 義，故意 hō in 看見；若 án-ni，就無得 tiòh 報賞 tī lín 天裡 ê 父。2 所以賑濟 ê 時，莫得 tī 你 ê 面前 pùn 號頭，親像假好 ê 人 tī 會堂 kap 街路所做 ê，ài 人榮光 in。我實在 kā lín 講，In 已經受 tiòh in ê 報賞 lah。3 獨獨你賑濟 ê 時，莫得 hō 你 ê tò 手知你 ê chiáⁿ 手 ê 所做；4 hō 你 ê 賑濟隱密；就你 ê 父，鑑察 tī 隱密 ê，beh 報答你。5 Lin 祈禱 ê 時，莫得親像假好 ê 人；因為 in ài khiā tī 會堂 kap 大街面 ê oat-kak 祈禱，beh hō 人看見。我實在 kā lín 講，In 已經受 tiòh in ê 報賞 lah。6 獨獨你祈禱 ê 時，tiòh 入你 ê 密房，關門，求你 ê 父，tiàm tī 隱密 ê；就你 ê 父，鑑察 tī 隱密 ê，beh 報答你。16 Koh lín 禁食 ê 時，莫得親像假好 ê 人帶憂容；因為 in 將 in ê 面變 pháíⁿ 看，beh hō 人看見 in teh 禁食。我實在 kā lín 講，In 已經受 tiòh in ê 報賞 lah。17 獨獨你禁食 ê 時，tiòh 抹你 ê 頭，洗你 ê 面；18 無 hō 人看見你 teh 禁食，是 hō 你 toà tī 隱密 ê 父看見；就你 ê 父，鑑察 tī 隱密 ê，beh 報答你。19 莫得為 tiòh 家已積聚財寶 tī 地裡，有蟲 kap sian phah-pháiⁿ，也有賊 iah 孔偷 thèh ê 所在。20 獨獨為 tiòh 家已積聚財寶 tī 天裡，蟲 kap sian 無 phah-pháiⁿ，也無賊 iah 孔偷 thèh ê 所在。21 因為 lín ê 財寶 tī hia，lín ê 心也 beh tī hia。